



## Terenga 6: Hōtaka 3 – Nō ... e ... ana

### He Mihi

Tomo mai anō ki te rauhītanga o ngā hautoa e pakanga nei kia ora te reo taketake o tēnei whenua. Ko ā tātou rākau pakanga, ko ō tātou whatumanawa, ko ō tātou hinengaro me ō tātou arero. Nau mai ki te taua o te reo.

### Hei Mahi Whakarongo

Ka mātaki tātou i te uiui a Tūmamao Harawira i a Kristin Ross e pā ana ki te kaupapa e rangahaua ana e Kristin i Te Whare Wānanga o Waikato.

Anei ngā pātai hei whakautu mā koutou:

- 1) He rangahau pēhea nei tana rangahau?
- 2) He aha i puta ai tā rāua whakatau kia whāngaihia te reo ki tā rāua pēpē?
- 3) He aha te matū o tana rangahau?

### He Whakamārama


Ka arotahihia tētehi whakatakotoranga hei whakapuaki i te wā e mahia ana tētehi mahi. Whakatauritehia ngā whakatakotoranga e rua e whai ake nei:

**Nō(ku/na/ū/Mea) e ... ana**

=

**I a (au/ia/koe/Mea) e ... ana**

### He Mahi Ī-papa



Whakaurua ngā kupu ki roto i tētehi rerenga kōrero, ka tīmata ki te pū 'Nō'.

---

---

### Hei Mahi

Panonitia ia rerenga kōrero kia rite tonu ai te tikanga o te rerenga, engari me rerekē te whakatakotoranga:

1. I te kaiako e kōrero ana, ka ūmere ngā tamariki.
2. I a rātou e haka ana, ka horo te atamira.
3. Nō ngā taiohi e katakata ana, ka tangi te pere.
4. Nō tō matua e tamariki ana, i whāngaihia ia e ana tūpuna.
5. Nōu e tū ana, māu pea te karakia e tuku.

### Whakautu:

**Mahi Īpapa:** *Nō tōku teina e kuraina ana i Tokoroa, i wehe ngā tuākana ki te whare wānanga.*

**Hei Mahi:**

1. Nō te kaiako e kōrero ana, ka ūmere ngā tamariki.
2. Nō rātou e haka ana, ka horo te atamira.
3. I ngā taiohi e katakata ana, ka tangi te pere.
4. I tō matua e tamariki ana, i whāngaihia ia e ana tūpuna.
5. I a koe e tū ana, māu pea te karakia e tuku.